

**NATIONAL ASSEMBLY OF  
SEYCHELLES**

*Wednesday 17<sup>th</sup> November,  
2020*

*The Assembly met at 5.02am*

*National Anthem*

*Moment of Reflection*

*Mr Speaker in the Chair*

**MR SPEAKER**

Prezidan Larepublik Sesel,  
Ekselans Wavel  
Ramkalawan,  
Premyer Dame Republik,  
Mrs Linda Ramkalawan,  
Vis-Prezidan Larepublik,  
Ekselans Ahmed Afif,  
Prezidan Lakourdapel  
Onorab Ziz Anthony  
Fernando,  
Sef Ziz Lakour Siprenm,  
Onorab Ziz Ronny  
Govinden,  
Minis Dezinyen Jean-  
Francois Ferrari, lezot Minis,  
Envite Distenge,  
Manm Lasanble,  
E telespektater ki pe swiv  
nou an deor, byenveni pou nou  
sesyon ozordi. E sa sesyon i  
lokazyon Ladres Prezidan  
Larepublik dan nou Lasanble.

Mon envit Prezidan pou fer son  
diskour.

**THE PRESIDENT MR WAVEL  
RAMKALAWAN**

Mr Speaker,  
Mr Deputy Speaker,  
Leader Lopozisyon,  
Leader Zafer  
Gouvernman,  
Manm Lasanble,  
Sef Ziz,  
Sef Prezidan Lakourdapel,  
Vis-Prezidan,  
Tou Minis,  
Ser ek Frer Seselwa.

Mr Speaker premyerman  
mersi bokou pou ou lakey ki  
ou'n akord mwan. Petet sa pti  
*joke* ki nou'n fer letan mon'n  
antre, letan mon dir *I am back*.  
Mr Speaker in dir avek mwan  
dir plito *I never left*.

Mon krwar ki sa i listre ki  
mannyer i en plezir pou retourn  
isi dan Lasanble Nasyonal. E  
taler nou ava koz en pti gin plis.  
Vreman i en plezir pou retourn  
dan Lasanble Nasyonal, pou  
adres Lasanble Nasyonal me osi  
atraver sa platform pou adres  
Lepep Seselwa.

Sa landrwa i anmenn  
bokou memwar, e mon touzour  
rekonesan pour sa loportinite ki  
Lepep Seselwa ti donn mwan  
pou servi zot swa koman zot  
Manm Elekte oubyen koman en  
Manm proporsyonnel.

Se byensir atraver Lasanble Nasyonal ki mon'n osi ganny sa ekspoze enternasyonal. E sa in osi permet mwan ranforsi non Sesel dan lemonn parlamanter swa kot CPA, *Pan-African Parliament*, SADC PF kot nou'n annan bann moman vreman inoubliyab. E kot nou de Onorab Aglae, nou ti ganny elekte pou vin bann *Chairman Komite*. E Onorab Terence Mondon li i ti vin Trezorye SADC PF.

Dan bann lezot ekspoze enternasyonal atraver Lasanble Nasyonal, mon'n osi ganny sa loportinite pou mwan al obzerv eleksyon koman en obzervater *Commonwealth*.

Respe ki mon annan pour sa lenstitisyon i enorm, e zot rol pou anmenn sa deba politik anmezir ki zot swiv byen pre travay Gouvernman atraver demann kestyon, Mosyon ek Lezislasyon i vreman enportan pour nou pep ek nou pei.

Mon'n diriz en mazorite dan 6enm Lasanble dan Lopozisyon. Sel leksperyans ki mon pa'n ganny sans fer, se pou diriz en tel gran mazorite parey i egziste ozordi e an plis asiz lo sa kote latab. Sa i en privilez ki zanmen mon'n gannyen e mon zalou zot en pti gin. Alors mon dir avek tou

bann Manm Lasanble bonn sans e kontiny sa bon travay ki mon'n deza vwar zot pe konmans fer.

Ozordi i fer egzakteman 24 zour, depi ki mon ti pret serman pou okip sa pozisyon pli gran serviter Lepep Seselwa. Sa leksperyans in enn, ki ziska prezan in fer ki toulezour i annan bokou sirpriz, kestyon ek sok lo en kote.

Me lo lot kote, in anmenn bokou lazwa, spesyalman letan nou novo Gouvernman in kapab idantifye e rezourd serten difikilte ki nou pep pe fer fas avek.

Mon bezwen admet avek Lepep Seselwa, ki pli gran lazwa ki mon pe eksperyanse se letan mon war sa novo lantouzyazm, sourir ek determinasyon lo figir nou pep.

Se sa ki pou permet nou avans devan e donn tou pour nou pei, sa zoli pti Sesel. Ozordi i evidan ki Seselwa pa pe zis dir ki Sesel i pli gran ki nou tou, me plito nou pe atrap lanmen kanmarad e dir ki nou pou travay dir, pou asire ki Sesel i vreman vin sa manman ki nou tou nou kontan.

E alor nou pou met tou nou zefor pou fer li monte, afen ki sakenn son zanfan i viv dan vre lafyerte dan en pei kot lazistas i renye, e son larises i

ganny partaze avek tou son zanfan.

Wi, Linda, nou fanmir avek mwan, nou pe dousman, dousman adapte avek sa novo responsabilite. Mon anvi profite pou remersye tou dimoun pour lakey ki zot in akord Linda, e i resamble ki i pe menm vin pli popiler ki mwan. Alors mon'n dir avek li atansyon la en? Mon fanmir i la a zot servis e kot nou kapab donn en lankourazman nou pou fer li avek gran ker.

Linda pe analiz tou bann demann ki i pe resevwar, e byento zot ava ganny plis lenformasyon lo ki rol spesifik ki i pou zwe lo nivo Nasional e menm enternasyonal.

Pandan sa 24 zour, in annan bokou desizyon ki'n ganny pran. E mon bezwen dir avek Lepep Seselwa ki sa lekip Minis in fini rantre dan zot bann diferan landrwa travay e pe fer marse zot diferan Minister.

Seselwa, i annan bokou travay pou fer. *Comme dir Kreol, "Travay i la!"* Mon kontinyelman remersye sakenn parmi zot pour aksepte bann diferan responsabilite.

Zot in kit tou pou servi zot pei. Mon dir zot mersi bokou e kouraz dan tou zot travay. Vis-Prezidan Afif avek mwan, nou

napa responsabilite direk okenn Minister dan Gouvernman.

Nou pas bokou letan travay ansanm pou analize e pran desizyon, lo ki mannyer nou pei pou bouz devan. Sa i osi permet okenn Minis pou koz avek nou.

Ansanm nou zwenn bann Komite Onivo, swa pou diskit size lekonomi, lasante oubyen servis piblik ek bokou lezot.

Travay i entans, me nou vreman satisfe lafason ki nou pe ganny bon kolaborasyon, e se sa ki permet nou kapab met tou nou zefor ek konesans a dispozisyon Lepep Seselwa. Mersi VP pour ou sipor san kondisyon.

La mon profite pou remersye tou bann dimoun ki'n asiste nou lo bann Komite, pou pli byen konpran serten pwen teknik afen ki nou kapab pran desizyon pour byennet sa pep.

Bann lorganizasyon tel ki SPDF, Labank Santral, e la mon rekonnert prezans Gouverner Labank Santral, Lapolis, Minister Finans, Lasante, ankor enn fwa mon rekonnert prezans Dr Jude Gedeon ek tou lezot in vreman, e zot in vreman annan en lapros ouver avek nou.

Lo lot kote, sa dan li menm in permet Gouvernman

pou kapab fer bann bon analiz, e rod semen lo ki mannyer pou avans devan.

Deza, o komansman menm, nou'n tenir lo nou prensip ki personn pa pou perdi son plas travay, me ki nou plito enterese ki tou travayer dan Gouvernman i kit politik kot li letan i desann pou vin travay.

Nou ensiste ki dan landrwa travay dan Gouvernman, napa okenn politik e ki preokipasyon tou travayer, se pou donn tou Seselwa meyer servis dan en pli kourt dele posib.

Nou pe rod lefikasite dan servis ki tou dimoun i resevwar. An mezir ki nou kontinyen etidye tou sa ki pe arive, mon bezwen dir ki mon satisfe an zeneral avek sa novo fason panse ki nou pep pe manifeste, me mon bezwen osi azoute ki i annan serten move mantalite ki pe kontinyen manifeste son lekor.

Mon senpleman fer en lapel, pour ki sa novo lespri respe ek lonnekte i renye dan tou landrwa travay.

Alor mon kontinyen ankouraz tou travayer pou donn zot meyer, donn sa ki meyer ki zot annan pour ki atraver zot kontribisyon, nou pei i ava bouz pli devan e

lepanouisman nou pep i ava vin nou priyorite.

Mon profite pou azoute ki nou servis civil i bezwen vin en landrwa, kot sak travayer i konsider sa travay ki i fer koman son biznes.

Si zot les zot ganny dirize par en tel lespri, se la kot nou pou ganny bon rezulta e nou performans pou monte, e nou pou ganny bann bon rezulta e non pa en sityasyon parey nou dir an Angle kot travayer pe zis *tick the box*.

Dan sa menm lelan, i bezwen annan en lespri lantreprenarya dan nou travayer servis civil. Toulezour fodre ki sak travayer i santi ki i pe progrese e ki i pe devlope.

Alor mon repeete ki tou travay i bezwen aport rezulta pour sitwayen e non pa gaspiyaz resours ek letan sa pep ki nou'n ganny demande pou nou servi.

Annou aret regard ler. Me dan sa moman difisil ki nou pe traverse, donn tou sa ki zot annan. Ankor enn fwa mon demande, ki nou met travay dir, en sanzman latitud ek en pli gran sans patrioyitzm koman sa novo filozofi, afen ki letan keksoz i ava amelyore dan nou pei napa personn ki pou bar sa pti Sesel.

E pou tou travayer mon dir ek zot kouraz e bonn sans. Mr Speaker, i tre enportan pour nou tou vin bann bon sitwayen pei. Yer sakenn ti pe kriy pour son parti politik e sa ti byen parski sa i en drwa fondamantal ki nou bezwen respekte. Me ozordi fodre ki nou tou nou realize ki nou tou nou Seselwa. E se sa lespri ki devret pous nou pour vin bann bon sitwayen.

Alor kwa ki en bon sitwayen i akonplir pour son pei? En bon sitwayen i patriyotik. I montre respe pour tou dimoun. I travay dir. I ede lev nivo moralite dan son pei. I pozitiv e rod sa ki byen. I montre konsern pour tou dimoun e pour son pei. En bon sitwayen i rod konstri kominote e non pa zis son lekor.

En bon sitwayen i pran swen avek lanvironnman son pei, e i pa sali oubyen detri sa menm lanvironnman. En bon sitwayen pa enport drog, vann drog e detri lazernes Seselwa.

En bon sitwayen i rode toulezour ki mannyer i pou atrap lanmen son vwazen afen ki ansanm zot kapab ariv pli lwen posib. I regard sa ki pli feb, sa ki pli feb ki li e donn li en koudmen.

Finalman, en bon sitwayen pa rode ki son pei i

kapab fer pour li, me plito kwa ki li i pou fer pou ki son pei i progrese.

Wi, Mr Speaker, sa ladministrasyon pe rode ki mannyer i pou fer Sesel prodwi sa bann bon sitwayen, afen ki nou fason panse i ava sanze, e nou pep i ava viv dan laverite, latransparans, lanmour ek solidarite.

Nou anvi ki nou konn vre rekonsilyasyon, retir tou lanmertim ek laenn dan bann leker fatige. Debout for lo kote lazistas, egalite, respe tou drwa nou kanmarad e montre ki tou zanfan dan mon vilaz i mon zanfan.

Mon senserman krwar ki nou kapab kree sa Sesel. E mon annan sa konviksyon ki moman in arive pour nou tou bouz dan sa menm direksyon. Se par legzanp ki mon'n promet ki mon pou diriz sa pei koman en bon sitwayen, e an mezir ki mon ekoute e pran desizyon mon pou travay pour ki Sesel i vreman vin pour tou son zanfan.

Wi Mr Speaker, frer ek ser Seselwa, avan nou al pli lwen i enportan pour mwan adres zot, afen ki nou kapab viv koman bann bon sitwayen, ki protez nou pei dan sa kriz medikal ki nou pe pas ladan ozordi.

Mon pa pe vin fer zot per, me mon bezwen koz fran e onnet avek zot tou lo size *COVID-19*, afen ki nou regarde kwa ki nou devret fer. Sityasyon mondyal *COVID-19* pe agrave e lemonn antye pe santi bokou sekous.

Isi Sesel Sekter Lasante e tou lezot sekter, pe sibir bann konsekans vreman dir. Selon tou provizyon, i paret ki sa sityasyon pou kontinyen agrave pour ankor plizer mwan. Sepandan, nou pei, i bezwen sirviv.

Nou byennet ekonomik e sosyal i a risk. I depann lo sakenn parmi nou, pou ede dan sa lalit kont *COVID*. Minister Lasante i dir ki nou stil lavi ozordi pa bon e se nou menm ki non selman pli gran danze pour nou prop lekor, me nou pli gran danze pour nou fanmir, nou lantouraz travay ek nou kominate.

An mezir ki nou esey relans nou lekonomi e akeyir plis viziter, i absoliman enportan ki nou tou, bann sitwayen, san eksepsyon, nou pratik bann mezir prevansyon avek plis langazman personnel e kolektiv.

Nou bezwen fer sa pour ki sa kosmar transmisyon kominoter *COVID-19*, pa arive. Bondye in beni nou pei ziska

prezan. E nou vreman dir en gro mersi pour sa lekip kot Minister Lasante dirize par Dr Jude Gedeon e Dr Louange, pour sa travay ekstraordiner ki zot pe fer.

Ziska prezan mon'n rankontre zot lo plizer repriz e zot konnen ki zot annan sipor dan travay ki zot pe fer, e mon ensiste ki silvouple nou ekout zot konsey.

Pour nou kapab fer sa, zot in dir mwan ki fodre mon repet sa bann mezir lasante biblik, ki nou tou nou bezwen kontinyen pratique pour nou kas okenn lasenn transmisyon *COVID-19*.

I nepli ler pour nou mazin zis lanmizman. E mon repeete ser ek frer Seselwa, i nepli ler pou nou mazin zis lanmizman.

Me pour nou pran nou lavi e lavenir nou pei o serye. Premyerman, annou, silvouple, pratik bann mezir lizyenn ki rekomande.

Dezyenmman, annou met nou mas partou e a tou moman kot i rekomande pour protez nou zanfan, nou fanmir, nou kominate ek nou menm. Trwazyenmman, annou gard zistans e annou evit kontak fizik ek nou prosen pandan ki nou dir bonzour.

Katriyenmman, annou pa groupe e fer parti. Sa i enkli

dan bann landrwa ki'n fek reouver. Byensir nou tou nou ti a kontan si ti napa *COVID*, oubyen si i ti'n ganny met anba kontrol.

Me malerezman *COVID* i ankor en menas pour nou pei. Alor annou gard antet ki sa gro danze i ankor par lao nou. E ki i zis nou, sakenn antre nou, atraver nou aksyon ki kapab ranport laviktwar e gard nou pei sen e sof.

A sa pwen, mon ti a kontan adres tou bann letablisman komersyal direkteman. Zot tou zot annan en devwar sivik e moral e i dan lentere tou biznes, zot biznes an partikilye pour zot osi kontribye aktivman pour kas sa lasenn transmisyon *COVID*. E mazinen i posib. Alor fodre nou pran prekosyon.

Mon enplor avek tou dimoun e zot bann letablisman komersyal alor, pour zot osi obzerv Lalwa e pratik tou bann gidans pour protez zot kliyan, zot travayer ek zot biznes.

Malerezman, mon bezwen ozordi anonse ki bann letablisman ki kontinyelman refiz obzerv Lalwa ek regilasyon pou bezwen fer fas avek aksyon sever, ki kapab enkli sispansyon zot permi loperasyon.

Mon pa ti a kontan ki sa i arive, me malerezman tro bokou dimoun pa pe pran keksoz serye. Mon lapel i tre senp. Annou ekoute e met bann regilasyon an pratik.

Me Mr Speaker mon anvi dir malgre bann move nouvel, mon annan gran plezir pou anonse ki sa Gouvernman in fer en kantite travay pandan sa 24 zour.

Yer swar, mon'n eksperyans en gran lazwa apre lanons ki en novo vaksen ki annan environ 95poursan efikasite kont *COVID* in ganny dekouver par en lakonpannyen ki apel *MODERNA*.

Tanperatir ki sa novo vaksen i ganny prezerve i bokou mwens ki sa lot. E la sa bon nouvel. En lenvestiser ki anvi reste anonim pour le moman, in promet pou donn Sesel 100mil sa vaksen le moman ki i ganny komersyalize boner an 2021.

**(APPLAUSE)**

### **THE PRESIDENT MR WAVEL RAMKALAWAN**

Lo lapar Lepep Seselwa, mon anvi dir li en gro mersi pour son sipor, ki donn nou gran lankourazman. Avek en pep ki'n ganny vaksen kont *COVID-19*, nou lekonomi i ava kapab repran pli vit ki posib e

nou lavi i ava repran en serten sans normalite, koman bann bon sitwayen. Me antretan, nou bezwen swiv konsey Minister Lasante.

En lot bon nouvel ki mon ti ava anvi anonse, i al pour zabitant Baie Lazare. Gouvernman fek resevwar garanti en don pour konstriksyon klinik zot distrik.

Mon pe swiv tre pros ki staz sa proze i été, ansanm avek Onorab Adelaide e tou bann laranzman pe ganny fer pour ki o pli vit posib, nou ava komans konstriksyon e termin sa facilite enportan pour zabitant sa distrik o pli vit posib.

**(APPLAUSE)**

### **THE PRESIDENT MR WAVEL RAMKALAWAN**

In pran bokou letan e la prezan zot merit ganny zot facilite medikal. Lot pli gro kado ki nou'n osi resevwar dan sa dernyen 24 zour, set en donasyon pour konstriksyon nouveau Lopital La Digue.

**(APPLAUSE)**

### **THE PRESIDENT MR WAVEL RAMKALAWAN**

Sa lopital i pour enn ki modern e ki pou annan sa bann facilite

swivan an plis ki sa ki egziste ozordi ;- sant izolasyon, sant pour dyaliz ek *x-ray*, lasanm prive, ward ladmisyon pour madanm, zom, zanfan ek maternite, ki pou pran 6 dimoun sakenn ek en lospis parey i annan lo Mahé ek Praslin.

I pou osi annan akomodasyon modern lo menm teren pour dokter ek ners. Sa lopital, parey zot ava kapab sezi, pa ti pou kapab ganny konstri lo sa sit aktyel kot Logan Hospital i trouve.

Mon profite pou remersye Gouvernman *UAE* pour sa zoli kado ki zot pe donn pep Digwa. Konsey bann eksper Lasante, Minister Lasante, in osi fer kler ki sa sit aktyel pa ideal pour konstriksyon en nouveau lopital. Spesyalman avek sa problem erozyon lakot. Grander sa lopital ek bann facilite ki i pou ofer, i fer ki teren aktyel dan La Passe I tro pti.

Konsep zeneral ti ganny prezante dan en *meeting* avek Lasosyasyon Biznes La Digue e apre dan en *meeting* piblik kot i ti ganny byen resevwar. Nouvo sit lopital i ganny trouve obor L'Union Estate, en propriete Gouvernman ki donn 3 arpan, obor *helipad*. Mr Jeffery Durup, en Digwa in menm ofer

en lot bout later, an ka si sa later pa ase. Mersi Ton Jeffery.

I enportan pou dir, ki ti napa okenn rezon valab lo akoz sa lopital modern e nef, ki plan pa ankor ni menm finalize pa devret ganny konstri lo sa novo sit. Mon ti a kontan profite pou osi dir, ki i mon lentansyon rankontre lafanmir Berlouis ki ti donn sa later kot lopital aktyel i trouve, pou regarde ki zot lentansyon an sa ki konsern sa teren kot lopital i trouve ozordi, apre konstriksyon novo lopital.

E avek zot Lakor, Gouvernman ti a kontan konstri en batiman pou bann servis Gouvernman, tel ki ; Imigrasyon, *Licensing Authority*, SRC, Civil Status e okenn lezot servis Gouvernman lo lot kote semen kot lopital i trouve. Sa i ava liber biro Ladministrasyon Distrik, kot serten sa bann servis ozordi i sitye ozordi.

Mr Speaker, dan menm laliny, i enportan pou dir ki nouvo Gouvernman in deza anonse ki sak MNA elekte, pou ganny en biro dan biro Ladministrasyon Distrik. Tou bann laranzman pe ganny fer e serten in menm deza vizit zot biro. Nou ava rapel ki ansyen Gouvernman ti deside anonse ki zot ti pou konstri en biro pou

sak MNA, me sa pa'n zanmen abouti. Mwan Mr Speaker mon ti parmi bann dimoun ki ti anmenn ansanm avek bokou nou bann koleg ki la ozordi dan Lasamble, ki ti anmenn en lalit asarne pou ki i annan *delinking* dan nou pei.

E alor serten i ava kapab demann kestyon, lo si sa plan pa pe fer return an aryer, e ki i kapab annan lenfliyans politik? Mon riye letan mon tann sa bann largiman. Akoz egzakteman parey sa petisyon konsernan lopital La Digue ki ti ganny sinyen avan menm ki zot ganny detay, mon swete ki dimoun ti ava annan pasyans pou konpran byen kwa ki pe arive. E ki transformasyon ki nou pe anmennen dan Gouvernman Lokal. Les mwan eksplike.

Mr Speaker, konpare avek avan kot ti annan paviyon parti lo Ladministrasyon Distrik, sa pou zanmen arive!

**(APPLAUSE)**

### **THE PRESIDENT MR WAVEL RAMKALAWAN**

Pou napa okenn paviyon politik ek lezot senbol politik, kot sa landrwa kot sa biro i trouve!

E alor sa biro i pou sa landrwa kot sa Manm Elekte i rankontre tou dimoun dan son

distrik. Sa i premye keksoz ki enportan. Akoz apre tou, zot konman Manm Lasanble Nasyonal zot sipoze pe servi tou dimoun, e non pa zis bann ki ti vot pou zot.

Mr Speaker, sa biro pa pou Biro Brans, parey zot ti apel li lontan. Me an plis ki sa, Gouvernman in fini adopte en nouveau fason pou swazir *DA*, e se pou sa rezon ki sa size *delinking* i pa leve.

Letan Minis Rose-Marie Hoareau ti vin kot mwan, e i ti dir mwan ki i annan serten pozisyon *DA* ki vid, kan nou pou apwente? Mon ti dir avek li non, nou pa pou apwent okenn *DA*. Me nou'n deside ki pozisyon pou nepli enn ki politik parey i ete ozordi, kot parey nou'n war kot en *DA* apre i vin kandida e menm *MNA*.

Nouvo fason fer, parey zot ava deza trouve dan zournal, se ki sa pos i ouver pou tou dimoun ki kalifye pou fer laplikasyon.

**(APPLAUSE)**

### **THE PRESIDENT MR WAVEL RAMKALAWAN**

Sa dimoun i ava fer son laplikasyon. I ava pas dan prosesis *interview* e meyer kandida i ava ganny swazir. Sa dimoun pou en *civil servant* e

tou regilasyon i ava aplike pou li e si i fer politik dan son lofis, li osi i ava ganny kosyonnen. Me la les mon asir Lepep Seselwa ki i annan en kestyon ki zanmen i pou ganny demande letan i pe fer sa *interview*. E sa kestyon se, "Lekel parti politik ki ou siporte?"

**(APPLAUSE)**

### **THE PRESIDENT MR WAVEL RAMKALAWAN**

Mr Speaker, mon demande ki *MNA* ek *DA* i fer en bon travay, zot fer en bon travay pou zot distrik. Pou ki dimoun i ava aret santi sa nesesite pou ekrir *State House*, pour zot ganny bann leksplikasyon vreman senp ki devret ganny rezourd lo nivo distrik. Mon ti mansyonnen sa depi premye zour. E alor mon pe demann zot ed mwan silvouple, i kontinyen i annan tro bokou let kot dimoun pe rod bann, bann solisyon senp.

Me lefe ki mon a pe koz avek Lepep Seselwa, mon anvi dir avek zot ki tou let ki zot ekrir mwan dan sa laliny, mon pou anway li kot bann *MNA*, bann *MNA Elekte*, oubyen si konsern en Minis mon ava fer li avek Minis.

Donk Mr. Speaker sa i mark en lot laviktwar sa lalit asarne, ki mon bann koleg ek mwan nou ti anmennen pou anmenn sanzman dan Sesel.

**(APPLAUSE)**

### **THE PRESIDENT MR WAVEL RAMKALAWAN**

Mr Speaker, avan ki mon termin sa sapit lo Gouvernman Lokal, i mon responsabilite pou anonse ki apre konsiltasyon, avek Minister Finans, Gouvernman in pran desizyon pou kennel eleksyon Konsey Distrik ki ti pou fer an Zanvye 2021. Rezon pou en tel desizyon i tre senp e i finansyel. Avek nou sityasyon ekonomik ki nou pe pas ladan, pei pa dan en pozisyon pou depans R20 milyon pou organiz sa eleksyon.

Apre selon tarif ki ti pey bann Manm lo Konsey Rezyonal, pou depans 3.12 milyon pou bann *Chairman Konsey Distrik* e en lot sonm 15.288 milyon par mwan. E sa i fer ki par mwan nou ti pou depans en total R18.4 milyon. E letan ou azout tousala ansanm pou en lannen, i donn en sonm R38.4 milyon.

Pei napa sa larzan mon pe dir zot avek tou fransiz, e Minis Finans e ansanm avek bann lezot dimoun ki dan sa O

Konsey ki nou pe zwenn lo nivo Finans zot in fer kler ki pei pa kapab. E S.I. pou sa lanons in deza osi ganny pibliye.

Mr Speaker, Sesel pou kontinyen travay avek tou pei, spesyalman bann ki deza nou bann *partner* pros ki rod en Polisi Zafer Etranzer ki promot Korperasyon mityel, e donn pli gran valer nou lentere komen. Mon'n deza dir e mon repeete, nou Souvrennte i sakre e a okenn moman nou pou donn li a okenn pei.

Sesel i apresye bokou sipor ki in gannyen avek son bann partner o milye sa pandemik. Ansanm avek bokou bann lezot pti pei zil, nou'n resevwar bokou sipor pou ed nou fer fas avek bann difikilte, afen ki nou repran. Koman bann pti pei zil, i kler ki nou bezwen bokou sipor pou nou sirmont bann difikilte ekonomi, ki'n vin koman en rezulta sa kriz medikal.

Dan lepase, Sesel in kapab rikord bann lendikater devlopman tre o, me fas a sa bann kriz souden e san presedans, ek bann sok ekonomik, nou'n trouv nou tre vilnerab. Ziska en nivo kot nou'n bezwen led kominote enternasyonal.

Alor, ankor enn fwa nou'n bezwen ganny sipor led sipor

internasyonal. Nou alor anvi dir en gro mersi, pou tou sipor ki nou'n resevwar e fer en lapel avek nou bann pei zanmi, pou kontinyen apiy Sesel ek son devlopman, pou ki ansanm nou ava kapab sirmont bann difikilte ki sa pandemik in enpoz lo nou. Nou lekonomi pou refer avek lagras Bondye e tou sipor ki nou donnen i ava e tou sipor ki nou osi resevwar pou ganny byen akeyir.

Mr Speaker, dan en lespri servi nou resours pli byen pou vin pli efektiv an mezir ki nou fer mwens depans, Gouvernman pou osi ferm 3 Lanbasad ki ava ede pou koup lo depans e redwir lo deviz etranzer. Sa bann Lanbasad i *Sri Lanka, Cuba* ek nou reprezantasyon an *Genève*. I pou osi annan plis zefor, pou fer nou bann Lanbasad travay pli pre avek nou bann biro touris.

Sesel pou pran en lapros, kot i travay ansanm koman en Gouvernman kot son relasyon Zafer Etranzer i konsernen. Alor tou bann Minister, departman ek lazans ki zot fonksyon, i annan en lenpak lo nou relasyon etranzer, pou travay tre pre avek Minister Zafer Etranzer ek Tourizm.

E la nou espekte sa bon korporasyon e mon kapab osi dir zot letan nou ganny en kado

nou pa pou dir atann pli tar nou ava vin pran. Letan nou ganny en kado, nou pou ale e nou pou dir la nou la donn nou, nou kado silvouple.

Donk Mr Speaker parey nou tou nou konnen lafanmir se labaz nou sosyete. I premye lenstitisyon ki edike, elve, e disiplin nou bann zanfan, e sa bann zanfan ki fitir nou pei.

Nou pou bezwen donn lafanmir en novo souf par restriktir sa Minister afen ki i kapab devlop e enplimant programm ki donn plis sipor nou bann fanmir, e anmenn en pli o nivo kalite lavi pou nou tou. Sa i ava redwir problem sosyal ki pe kontamin nou sosyete. Lanfaz pou lo prevansyon, ledikasyon, ek devlopman kapasite.

Lazenes se larelev, se fitir. E alor tou sa zefor ki nou pe mete pou redres nou lekonomi, pou met drog anba kontrol, ek lezot ankor, pou anven si nou pa prepar nou bann zenn pou soutenir nou bann reisit.

Nou pou bezwen annan programm pli modern e ki ganny enplimante dan en fason pli pozitiv, e ki anmenn en vre lenpak dan tou laspe devlopman kominoter. Politik fodre ganny retire net dan sport, fodre annan plis partisipasyon o nivo lafanmir

dan spor. Zesyon spor pou ganny ranforsi, pou ki i annan en lapros pli profesyonnel, afen ki nou bann atlet i vreman annan motivasyon e ki zot rev i ava vin vre kan Sesel i ava ganny son premye meday Olenpik pou krwar pa an 2021 letan nou annan Olenpik 2020 an *Tokyo*?

Mr Speaker, nou pei pe pas dan en peryod gran tirbilans. Malerezman pou mon lekip ek mwan menm, nou pe pran labar nou pei dan en moman kot Sesel pe fer fas avek 2 pli gran kriz dan son listwar; en kriz sanniter lasante ki pe trenn nou dan en kriz ekonomik avek en lanpler san presedan.

Pandan sa 2 dernyen semenn, anmezir ki mon ti pe resevwar bokou lenformasyon enportan lo sityasyon ekonomik nou pei, tou mon bann lenkyetid ti ganny konfirmen. Tou sa ki bann eksper ti pe dir nou, e ki bann obzervater lokal e etranze ti pe atir nou latansyon lo la, sa bann keksoz in ganny konfirmen.

An zis detrwa mo, les mwan dir zot ki lekonomi Sesel i vreman dan mal! Zafer pa bon! E letan zafer pa bon nou pa kile o kontrer nou pran desizyon e nou bouz devan.

Bann eksper pe endike ki kontrer avek o komansman sa

lepidemi, kot nou ti ekspekte nou lekonomi isi Sesel kontrakte par 10.8poursan nou ekspekte en sityasyon vin pli grav, e sa pou tonm 13.5poursan pou 2020. Me menm sa sif i kapab monte ankor.

Nou lendistri touris in vreman ganny bate e nou pou fini lannen avek 73poursan mwens touris konpare avek 2019. Sa i fer en lenpak direk lo tou bann lezot sekter nou lekonomi tel ki pri marsandiz, kou transportasyon ek servis an zeneral.

An vi tou sa sityasyon vreman grav, i annan plizyer mezir ki pou ganny enplimante, pou asire ki nou depans i ganny fer dan en fason pli efektiv posib, par prioritiz nou depans e asire ki nou Bidze i soutenab.

Nou det in ariv en nivo ki deza pa soutenab. Si Gouvernman i kontinyen depans lo nivo ki i pe fer son rezulta pou katastrofik pou nou pei. Gouvernman i bezwen retourn son Bidze dan en lets ki soutenab. Dan sa moman kot nou pe viv, reveni pou kontinyen ba akoz aktivite ekonomik i osi ba.

Annefe nou vvar ki sityasyon dan nou bann marse kle pou tourizm an *Europe* in deteryore, e menm serten pei in

remet *lockdown*. Sa in fer ki i annan menm bann avyon an relasyon avek nou Sesel, ki'n sispann zot loperasyon tel ki *Ethiopian Airlines* e *British Airways*, an vi ki napa ase pasaze. En rezulta direk bann tel sityasyon se ki nou Roupi i devalye. Tou dimoun in vwar ki mannyer Dolar in ariv par lao R20. Nou tou nou rode ki pou nouveau *rate*. Son lenpak direk i vin lo lenportasyon e byensir lo pri lavi.

Dan sa menm souf, mon anvi anonse ki an konsiltasyon avek Minister Finans, malgre ki nou pe pas dan serten difikilte e avek konsiltasyon osi avek Labank Santral Gouvernman in pran desizyon ki si en dimoun oubyen en lakonpannyen i annan son deviz etranzer, e ki i pa pou bezwen aste Dolar avek bann labank, i pou kapab fer vini son transpor. Sa mon bann frer ek ser i en premye pa, dan en direksyon kot nou pe anvizaze nou lekonomi i ava large.

E sa i en demann ki'n osi ganny fer par bann lakonpannyen ki enport loto, ki pe dir i annan bann endividé ki deza annan zot larzan an *forex* pa an Roupi parske nou pa anvi okenn Roupi i tay deryer Dolar. Sa parey mon'n dir i en pti louvertir e ki an menm tan nou

pa kapab zis viv lo move nouvel, alors i pou annan serten louvertir.

An 2021 Mr Speaker, nou pou bezwen reviz *Scheme FA4JR*, vi ki nou pa pou kapab soutenir en depans environ R1.4bilyon. Frer ek ser mon vin koz ek zot a tout fransiz, politik de kote nou bezwen regard nou pei.

Alor mon bezwen dir zot, ki deza i annan en gran legzersis ki pe ganny fer pou restriktir sa programm, afen ki i vin pli vize lo prodiktivite e ankouraz Seselwa pou leve e pran travay ki ava fer ki nou koup lo lakantite travayer etranze. *URS, My First Job* ek *SETS*, pou neseserman bezwen zwe en rol pli aktiv ki pou permet ki Seselwa kalifye, pou bezwen ranplas etranze. Sa i ava ede pou soulaz nou depans akoz parey nou tou nou konnen, travayer etranze i met plis presyon lo nou rezerv deviz. Nou bezwen donn Seselwa lanplwa afen ki Bidze sosyal i ava kapab redwir.

Avek sa sityasyon ekonomik kot Roupi i kontinyen devalye e Dolar ki rantre dan kof Leta i kontinyen redwir, Gouvernman, ki pe deza pey saler dimoun dan Sekter Prive i trouv li dan en pozisyon enposib pou pey saler Trezyenm

Mwan. Total ki Trezyenm Mwan lapey pou kout Gouvernman dan sa sityasyon kot nou ete ti pou ariv parske pou pey *both* pou Gouvernman e osi pou sekter prive ti pou ariv en sonm environ R541milyon. Malerezman nou tou nou bezwen partisip dan sa sakrifis.

E alor, i avek gran regre ki mon bezwen anonse ki tou bann peyman benefis lafen lannen, pou tou bann pozisyon konstitisyonnel an komansan par lofis Prezidan, Vis-Prezidan, Minis, MNA ek tou lezot pa pou kapab ganny peye sa lannen. Pou napa peyman ...

**(APPLAUSE)**

### **THE PRESIDENT MR WAVEL RAMKALAWAN**

Pou napa peyman Trezyenm Mwan dan Gouvernman ek dan sekter prive, me sa pa defann sekter prive ki anvi donn son travayer en bonous pou donn zot. Tou lamannman legal pou ganny fer par lofis *Attorney Zeneral*. Sepandan sa pa pou aplik pou peyman Kontra lafen zot servis.

Koman en parti nou zefor pou adres sa size kou lavi, nou pou siport STC pou redwir son kou operasyonnel otan ki posib. Nou pou komans par transfer batiman *Hypermarket* ki STC pe

lwe avek SSI lo STC. Sa deswit pou retir en fardo R13.2 milyon lo STC ki ava ed li pou stabiliz pri bann komodite ki i vann avek Lepep Seselwa. Gouvernman *L'Inde* in fini dakor pou fer don pou met pano fotovoltaik lo twa batiman *Hypermarket*, ki ava fer ki sa kou elektrisite plis ki R1milyon par mwan ki STC i peye ozordi i ava ganny redwir.

Alor sa i ava fer ki STC i ava fer en lekonomi omwen R20 milyon an 2021. E mon pou ensiste ki sa benefis i ganny pase avek bann kliyan, pou ki konsonmater i ava santi en rediksyon lo pri. Minister Finans in ganny demande pou asire ki tou sa bann mezir i ganny pran, e ki Seselwa i benefisyen.

Mr Speaker, avek bi ranforsi tou nou zefor an preparasyon pou relans nou lekonomi apre *COVID*, Gouvernman pe deza rantre an negosyasyon avek *IMF* pou asiste nou adres serten size tel ki;- o nivo det piblik, stabilite dan pri ek kriz balans peyman. En programm *IMF* i ava ede pou redonn nou stabilite ekonomik e ankouraz devlopman ekonomik.

Sa i ava donn nou sa sipor finansyel ki nou bezwen pou relev nou rezerv *forex*. Bi

imedyat sa programm avek *IMF* se pou re balans nou Bidze e alor donn nou en nivo soutenab kot nou det i konsernen. An plis ki sa i ava ed nou pou restriktir nou bann det.

Mr Speaker, frer ek ser Seselwa tou bann Manm Lasamble, nou bezwen zer nou lekonomi dan sa menm fason ki nou tret nou depans dan lakour. Kan sa manman oubyen sa papa i ganny koup son lapey, mwens larzan i antre dan lakour e fanmir antye i soufer.

A sa pwen, en fanmir ki responsab napa swa me bezwen re balans zot Bidze e reevalye kwa ki pli enportan pou depans lo la.

Me atraver bann desizyon difisil ki zot pran pou koup lo serten depans, zot arive asire ki tou zanfan pa al dormi vant vid. Se dan sa menm lespri ki Gouvernman pe pran sa bann desizyon ki sitan enportan, pou asire ki nou lekonomi i kontinyen sirviv dan sa moman kriz.

Nou konpran ki sa pou fer ki Nwel sa lannen pa pou parey. Nwel pou diferan ki lannen pase. Me lesansyel se ki nou kontinyen met antet ki nou lanplwa i ankor la. Kan festivite Nwel ke lannen i fini, malgre ki i pou diferan, nou pou kapab

retourn dan en lanplwa ki asire. Se sa garanti ki Gouvernman pe anmenn devan zot.

Gouvernman pe ankouraz tou dimoun pou pran okenn lanplwa ki prezante. Pran li o serye ozordi ! Seselwa mon bann frer ek ser aret azir konmsi ou annan gran swa parey petet ou ti annan yer, kot ou ti kit en lanplwa e rantre dan lot. Sa sityasyon in sanze.

Mon espere ki zot in ekout byen Gouverner Labank Santral, Mrs Caroline Abel mwan mon ekout li tre byen letan i kontinyen koz avek nou lo sityasyon ekonomik. Parey mon'n dir pli boner dan mon diskour, nou anvi ranplas travayer etranze avek Seselwa, alor i kler ki nou travayer Seselwa i bezwen delivre, i bezwen annan en sanzman dan lafason ki nou apros travay.

Annou pa zis asize, e ganny bann move repitasyon. Non! Mwan mon pe fer en lapel direk avek nou Seselwa, leve travay, aret regard ou mont aret regard Lorloz, me delivre.

Vin pli disiplinen. Pa mank travay pou en wi oubyen en non, montre plis responsabilite. Lo plizyer repriz mon'n dir ki travayer Seselwa set en debouryer. Mon repet li ankor ozordi. E la dan sa

moman difisil, annou montre ki vreman nou annan sa kouraz ek determinasyon pou debout for pour nou pei ek nou fanmir. I pa moman pou nou esey fer zis sa ki nou anvi. Nou devret vize pou nou vin pli prodiktiv, e zwe nou rol pou remet nou lekonomi lo son lipye.

Si nou sakrifye si nou fer sa sakrifis ozordi, moman pou arive dan lavenir, kot nou pou ganny sa kouraz ki nou vreman kontan, e kot nou trouv nou bokou pli ris, senpleman akoz nou pli determinen ozordi, akoz pandan letan dir pandan letan dir nou pa'n les sa fer nou per, me o kontrer in fer nou pli for.

Alors parey en bon atlet, ozordi annou pas dan sa kriz konmsi nou pe *train*, pou ki letan keksoz i sanze, nou ava kapab mont lo laplenn e vin vreman bann dimoun ki ganny sa gro meday lor.

Frer ek ser, mon osi fer en lapel avek bann anplwayer pou pran travayer Seselwa e donn zot lantrennman neseser e ofer zot en lapey akseptab, ki ava donn zot bon motivasyon pour zot kapab nouri zot fanmir. Mazinen ki i pli bonmarse pou rod en travayer Seselwa. La i moman pou nou mazin sa, akoz sak aksyon ki nou fer pou annan en lefe direk lo nou lekonomi dan sa moman kriz.

Nou pei i devret vin premye. I selman letan sakenn antre nou i fer son par dan sa latas enorm ki nou pou kapab rekolte benefis en lekonomi stab.

Mon lans en lapel alors avek tou bann ki pa ankor sezi, ki zot merit fer zot bout e ki pa ankor konmans montre ki zot osi zot in pare pou fer zot bout, pou sanze. E mon demann zot sanz vitman.

I annan en sanson ki dir ki nou tou nou annan par dan larises nou pei. Wi, sa i vre, me pou nou kapab reklam sa par, nou bezwen konmans par kontribye nou par. Pa vin dir ou annan par me selman ou pa kontribye nanryen.

Pa zis antre dan lakour ouver kastrol. Me eski ou'n kontribye pou sa ki dan sa kastrol. Se sa ki mon pe dir ek Seselwa.

Alors, dan sa novo Sesel ki devan nou, nou tou nou pou bezwen travay. Nou tou nou pou bezwen fer nou bout. Nou tou nou pou bezwen kontribye pou fer Sesel monte.

Frer ek ser, Mr Speaker mon lapriyer i reste parey. Mon demande ki Bondye Tou Pwisan i donn tou Seselwa novo lafors, novo lankourazman, novo lanvi pou son pei. Mon demande ki Bondye i beni nou, nou zoli pei Sesel e protez li dan

sa moman difisil. Ki i vers son lafors ek son lalimyer lo ou, e lo tou Seselwa e lo tou dimoun ki dan nou pei.

Mr Speaker tan ka mwan, mon sel promes ki mon'n fer avek Lepèp Seselwa, se ki mon pou debout konman son serviter. Mon pou kontinyen debout lo zot kote, e ki mon pa pou zanmen les tonbe mon pei e mon Sesel! Mersi bokou.

***(standing ovation)***

**MR SPEAKER**

Mr Prezidan lo lapar nou Lasanble, mon remersye ou pou ou diskour e mon remersye nou bann envite pou ki zot in partaz sa moman avek nou. Avek sa nou Lasanble pou *adjourn* e nou pou repran travay demen bomaten 9er. Mersi bokou.

***(ADJOURNMENT)***